

LIGJ
Nr.10 340, datë 28.10.2010

**PËR PAGESËN E DETYRIMEVE NDAJ TË TRETËVE TË NDËRMARRJEVE DHE SHA-
VE NË PRONËSI TË PUSHTETIT VENDOR**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Neni 1

Në rastet kur njësitë e qeverisjes vendore, bazuar në ligjin nr.8652, datë 31.7.2000 “Për organizimin dhe funksionimin e qeverisjes vendore”, i ofrojnë shërbimet dhe mallrat publike nëpërmjet ndërmarrjeve publike, shoqërive aksionare ose formave të privatizimit të tyre, këto njësi janë përgjegjëse për menaxhimin dhe për të gjitha detyrimet që rrjedhin nga veprimtaria e tyre.

Neni 2

Në rastet kur ndërmarrjet publike dhe/ose SHA-të, në pronësi të pushtetit vendor, nuk paguajnë në kohë detyrimet e tyre ndaj të tretëve, njësitë e qeverisjes vendore janë përgjegjëse për pagimin e tyre.

Neni 3

Për rastet e përcaktuara sipas nenit 2 të këtij ligji dhe kur ndërmarrjet dhe/ose SHA-të subvencionohen nga pushteti qendror dhe/ose vendor, Ministri i Financave, nëpërmjet strukturave të tij, verifikon arsyet e mospagesës së detyrimit ndaj të tretëve vetëm për çështjet që lidhen me interesat jetikë dhe bazë të komunitetit (furnizimin me ujë të pijshëm, pastrimin e mbeturinave, kanalizimet etj.).

Kur Ministri i Financave, bazuar në verifikimin e kryer, vlerëson se përgjegjëse për detyrimin është njësia e qeverisjes vendore përkatëse, nëpërmjet degëve të thesarit, bën bllokimin e veprimeve financiare të njësisë vendore që ka në pronësi ndërmarrjen dhe/ose SHA-në, për detyrimet ndaj të tretëve të këtyre ndërmarrjeve dhe/ose SHA-ve deri në ditën e likuidimit të detyrimit.

Neni 4

Ngarkohen Ministri i Financave, Ministri i Punëve Publike dhe Transportit dhe Ministri i Ekonomisë, Tregtisë dhe Energjetikës, për nxjerrjen e një udhëzimi të përbashkët për zbatimin e këtij ligji.

Neni 5

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.6761, datë 10.11.2010 të Presidentit të Republikës së Shqipërisë,
Bamir Topi